


Schträuemache



Unser Dode hot zwä Küh ghat. Wenn mer im Winter for die Küh es Häü in de Fuddermaschin gschnidde hot, dann is unners Häü immer Schtrou gmischt worn, weil sunscht es Fudder net glangt het. Es Schtrou hot äbber dann als Schträue for de Schtall gfehlt. Des war net blous bei de Dode sou, sondern bei de merschte Läüt. Deswäche is mer naus in de Wall zum Schträuemache gange.

Fors Schträuemache hebbe die Läüt brädi Haue ghat, die wu so ähnlich aussehe hebbe, wie die Mischtkratzer im Schtall. Mit dene is im Wall daus es Laab, es Möschi,

Häädlebeerkräuti un was sunscht no sou alles gwagsche is zsammegegratz worn. Des Zäuch is uff Haufe gsetzt un schpäter hem gfahrn worn.

Eemol hot die Dode e Schträue-Lous dausem Zwätteberich ghat. An eme Samschtichmorche hot se es Veschper eigepackt, e schöüns Krüchle mit Moscht for de Dorscht vollgefüllt un dann is se mit em Mina un em Rudel zsamme uffgebroche de Seife nuff un de Summerberch obbenaus.

Wie se hinne am Röüdi warn, sen uff eemol dicki Wolke doherkumme un gedunnert hots a. Kaum warn se sou richtig im Wall dinn, do hots, a scho ogfange zu rächern. Zum Glück sen se an eme grouße Felse vorbeikumme. Der is obbe e Schtück überghenkt, sodaß mer gut unnedrunner sitze gekönnt hot, ohne daß mer naß worn is.

Do sen se noghockt. Weils halt gar net uffghört hot zu rächern, hebbe se sich gsäht, wenn mer jetzt aus der Höül nausgejn, do wern mer blous drätschnaß un dann hebbe se erscht emol ebbs gveschpirt. Zum Schwartemaachebrout ghört a was zu drinke, hebbe se gedenkt, un es Krüchle leer gmacht.

Ja un dann sen se müd gwäie un weils immer no grächert hot, do hebbe se sich e bisle noglejcht un dann sen se alle drei eigschloofe. Mer solls net glaabe, als se widder uffgwacht sen, do wars doch tatsächlich scho Obend un do sen se halt widder hemm gange. Schträue war keens gmacht worn, äbber es Veschper hebbe se wenigstens net ümmesunscht mitgnumme ghat.

